

Sastanak najviših zvaničnika za usaglašavanje plana za borbu protiv kriminala

Zvaničnici policijskih snaga BiH, Ministarstva unutrašnjih poslova i Državne granične službe će unaprijediti saradnju sa svojim kolegama u Srbiji i Crnoj Gori, kako bi osigurali da oslobađanje osoba iz pritvora nakon ukidanja vanrednog stanja u Srbiji i Crnoj Gori neće imati negativnih posljedica za Bosnu i Hercegovinu. Ovo je jedna od mjera dogovorenih na sastanku najviših zvaničnika o borbi protiv organiziranog kriminala, kojim je predsjedavao visoki predstavnik Paddy Ashdown, i koji je održan u srijedu u Uredu visokog predstavnika.

Sastanku je prisustvovao ministar unutrašnjih poslova Federacije BiH Mevludin Halilović, ministar unutrašnjih poslova Republike Srpske Zoran Đerić, direktor Državne granične službe Nijaz Spahić, ministar sigurnosti BiH Bariša Čolak, direktor SIPA-e Sredoje Nović, i komesar EUPM-a Sven Frederiksen.

Učesnici sastanka su se usredotočili na razmatranje mogućnosti da lica oslobođena iz pritvora u Srbiji mogu doći u Bosnu i Hercegovinu, posebno ako imaju financijske ili porodične veze u BiH. Dogovorene su sljedeće mjere:

Mjere koje se trebaju poduzeti u naredna 24 sata

- 1) Uspostaviti kontakt sa nadležnim organima (MUP, Ministarstvo unutrašnje sigurnosti, Granična služba) u cilju pribavljanja svih raspoloživih informacija u vezi sa uhapšenim licima koja su kasnije puštena na slobodu.
- 2) Ponuditi pomoć i saradnju na svaki pravno mogući način

da bi se spriječile kriminalne radnje u Bosni i Hercegovini ili Srbiji i Crnoj Gori od strane lica koja su puštena na slobodu.

Mjere koje se trebaju poduzeti u naredne 2-3 sedmice

1) Operativni sporazumi između državnih tužilaca Srbije i BiH, te između državnog tužioca Srbije i glavnih tužilaca Entiteta.

2) Potpisani sporazumi (Memorandumi o razumijevanju) između ministara pravde odnosno ministra sigurnosti, odnosno entitetskih ministara unutrašnjih poslova.

3) Posebni potpisani sporazumi između Ministarstva unutrašnjih poslova Srbije i: SIPA-e, entitetskih ministarstava unutrašnjih poslova; poreznih organa i DGS-a.

“Ne smatramo da će prestanak vanrednog stanja u Srbiji stvoriti krizu u Bosni i Hercegovini”, rekao je visoki predstavnik nakon završetka sastanka. “Međutim, mi ipak poduzimamo mjere opreza kako bismo osigurali da do toga ne dođe. Ono što *zbilja* smatramo jeste da razmjera organiziranog kriminala na Balkanu *odista* predstavlja krizu, te su stoga mjere koje smo danas dogovorili dio dugoročnih ozbiljnih napora na direktnom rješavanju te krize.